

**Sunday, March 8, 2026**


**Time - 2:30pm - 2:35pm**

**AKASHVANI AIZAWL**

**REGIONAL NEWS UNIT**

**REGIONAL NEWS BULLETIN**

**(MIDDAY)**



**BJP MEET VP**

Vice President Pu CP Radhakrishnan chuan Mizorama All India Institute of Medical Sciences (AIIMS) din a nih theih na'n theihtawp chhuah a tiam.

BJP Mizoram hruaitutenZirtawpni zan khan Vice President, Pu CP Radhakrishnan chu Lok Bhavan ah hmu-in BJP Mizoram State President Dr. K. Beichua leh hruaitu dangte chuan Mizoram mamawh hrang hrang, a bikin Mizorama AIIMS din ve chungchang an sawipui a. Dr. K. Beichhua chuan kum 2018 leh 2023 assembly inthlanah BJP Mizoram-in Manifesto- a an dah tawh thu leh AIIMS damdawi in emaw a tlukpui an dil tawh thu a hrilh a. Vice President chuan an thu thlen chu tha a tih thu leh AIIMS chungchang chu BJP Mizoram hruaitute'n palai tira Union Health Minister hnenah ziaka lehkha theh lut tur leh theihtawp chhuahpui a tum thu a lo hrilh a ni.

Pu CP Radhakrishnan chuan India ram chu tun hmain Economy dinhmun hniam tak ah a awm thin a, mahse, tunah chuan World Economy tha tehna ah 4-na ni mekin, hun reilote-ah 3-na a ni thuai dawn, a ti a. India ramin nasa takin hma a sawn tih sawiin,India rama chengte zingah hnam ziarang hrang hrang, Sakhaw hrang hrang bia te an awm a, chung an hnam nunphung leh Sakhuaana te chu an vawnhim a, an inzahtawn sak a tul a, mahni sakhua leh hnam ziarang chawisan kawngah rinawm a ngai a ni, a ti.

Vice President chuan Mizoram nuam a tih thu sawiin, han hawi vela Pathian thil siam mawi tak tak hmuh tur awm te chuan nun a ti hahdamani,ati a, hmasawna hrang hrang luang lut mek te zingah rel hmanga inkalpawhna chuan Mizoram mipui tan malsawmna a thlen ngei a rin thu a sawi a. Viksit Bharat 2047 lo thleng turah Mizoram pawhin hmasawna tha zawk an neih zelna tur atan theihtawp chhuah a, mi retheite tana ruahmanna tha tak tak te chu hre lote hnena hrilh kawngah neitu nihna changa puangzar zel turin BJP Mizoram hruaitute chu a chah bawk a ni.



## CONFERENCE

Mizoram Presbyterian Kohhran Hmeichhe Inkhawmpuilian Rorel Inkhawm vawi 13-na, Champhai Vengthlang Presbyterian kohhran Biak Ina nghah chu zanin hian a tiak ang.

Nimin khan Palai mi 1,049 ten nilengin ro an rel a, kum 2028-a Rorel Inkhawm vawi 14-na chu March ni 10 atanga ni 12 chhungin Sihphir ah nghah a ni ang.

Kumin rorel inkhawmpui atana thupui chu 'Sim rawh u, vanram chu a hnai tawh e (Matthaia 4:17)' tih ani a, nizan inkhawmah Synod Moderator, Rev. John Raldosanga'n Pathian thuchah a sawi a, vawiin atangin Inkhawmpui thupui tlawhchhanin thupui sawi tura ruat - Rev. Remlalfaka, Secretary, BSI Aizawl Auxiliary in inkhawm apiangin thu a sawi thin tawh dawn a ni.

Tun dinhmunah Mizoram Presbyterian kohhran Hmeichhe inchhiarna atanga a lan danin Pastor bial leh kohhran mala zawmtu 223 awm mekin Kohhran Hmeichhe member nuai 2, sang 8 leh 921 an awm a, Pastor bial zingah Champhai Vengthlang Pastor bial chu member tam berna niin member 3122 an awm a, Buarpui bial chu bial te ber niin member 36 an awm thung a ni.



## LUNGLEI CAMPUS

Higher & Technical Education Minister Dr. Vanlalhlana chuan Lunglei a Mizoram University Campus din turin sorkar laipui sum rawn pek nghah a nih thu a sawi.

Dr. Vanlalhlana hian Pu Ramthanmawia leh Pu R. Rohmingliana te zawhna intawm chhangin Lunglei a Mizoram University Campus dah chu Ministry of Human Resources Development hnen atangin din phalna a thuphung a hmuh tawh ni mah se, Sorkar laipui atangin tanpuina (Grant) tel lova Course intum chawp (self-financing course) hmangin bul lo tan ni se tih leh sum senso turte Mizoram University sum lakluh atanga pek ni se an rawn ti a. Thil buangbarthlak tak a nih dawn avangin Sorkar laipui sum (Centrally funded) ngeia din theih hun nghah rih tha ber a ngaiin, thutlukna siam a ni ta a ni, a ti.

Zawhna dang chhangin Minister chuan tuialththei atanga Mizoram Sorkar-in chhiah a lak Social Infrastructure & Service Cess atangin Higher & Technical Education Department in cheng nuai 150 an dawn tawh thu Assembly a hrilh a. Sum hi hman a la ni lova, College tihchangtlun na'n College hrang hranga sem tura ruahman a ni, a ti.



## ANIMAL FEED PLANT

Lengpui a ran chaw siam chhuahna tur Animal Feed Plant dinna atan cheng nuai 744 leh sing 6 hmuh a nih tawh thu Vety Minister Pu C. Lalsawivunga'n Assembly a hrilh.

Lt. Col. Clement Lalhmingthanga zawhna ziaka chhangin Pu C. Lalsawivunga chuan sum hi NABARD atanga hmuh a nih thu leh mimal rama sak a nih thu a sawi a. He hna thawk tura inremna hi Secretary, A.H & Veterinary Department, leh Pu V. Malsawmdawngliana, Chanmari, Aizawl ten January ni 17, 2024 khan an siam tih sawiin. An inremna ang chuan hna thawh zawha thil tihfel hnu thla 6 na atanga chhiar tan in, Kum 19 chhung atan agreement hi siam a ni,ati a, a hnulam chu sawiho leh tur a nih thu a sawi bawk a ni.



## ASSEMBLY SESSION

Naktuk chawhma dar 10 leh a chanve atanga Assembly Budget session chhonzawm turah Mizo tawng India Constitution Schedule 8-na a dah tura rawtna official resolution sawiho a ni ang.

Chawhma dar 10 leh a chanve a assembly session tan a nih hunah darkar khat chhung chu zawhna leh chhanna hun atan hman a ni ang a. Chumi zawhah Finance changtu Chief Minister Pu Lalduhoma'n Economic Survey, Government of Mizoram 2025 – 2026 a pharh ang a. Education Minister Dr. Vanlalhlana'n India Constitution schedule pariatna angin Mizo tawng hi India ram tawng zinga pawm ni se tih resolution a pulut ang .

